

0.0.1 paṭipadāsuttam

0. sāvatthiyaṃ

1. micchāpaṭipadañca vo bhikkhave desissāmi sammāpaṭipadañca. taṃ suṇātha. sādhukaṃ manasi karotha. bhāsissāmīti. evaṃ bhanteti kho te bhikkhū bhagavato paccassosum. bhagavā etadavoca:

2. katamā ca bhikkhave, micchāpaṭipadā? avijjāpaccayā bhikkhave, saṅkhārā. saṅkhārapaccayā viññāṇaṃ. viññāṇapaccayā nāmarūpaṃ. nāmarūpapaccayā salāyatanam. salāyatanapaccayā phasso. phassapaccayā vedanā. vedanāpaccayā taṇhā. taṇhāpaccayā upādānam. upādānapaccayā bhavo. bhavapaccayā jāti. jātipaccayā jarāmarañam, sokaparidevadukkhadomanassupāyāsā sambhavanti. evametassa kevalassa dukkhakkhandhassa samudayo hoti. ayaṃ vuccati bhikkhave, micchāpaṭipadā.

3. katamā ca bhikkhave, sammāpaṭipadā? avijjāya tveva asesavirāganirodhā saṅkhāranirodho. saṅkhāranirodhā viññāṇanirodho. viññāṇanirodhā nāmarūpanirodho. nāmarūpanirodhā salāyatananirodho. salāyatananirodhā phassanirodho. phassanirodhā vedanānirodho. vedanānirodhā taṇhānirodho. taṇhānirodhā upādānanirodho. upādānanirodhā bhavanirodho. bhavanirodhā jātinirodho. jātinirodhā jarāmarañam, sokaparidevadukkhadomanassupāyāsā nirujjhanti. evametassa kevalassa dukkhakkhandhassa nirodho hoti.

ayaṃ vuccati bhikkhave, sammāpaṭipadāti.